

GUITS NE PQUIAA

JUDAS

¡Diuzh to!

¹Naa nac Judas, bets Santiagw; xtsiin Jesús quiayun naa.

Laa naa rxel guits rii lo to, grëse to ne nac to zha ne bredz Dios bzëëb xnëz me. Ne nligaa nquialadz me to, ni haxta quianap Jesús to.

²Dios glu ganle pa lotaa rquia zdoo me to, pa lotaa rleynie me to, ni pa lotaa noxco me to zeena peet tsienied guic to.

³Bets, bzian, mine gocladz naa nzet naa nu ganle zha nactaa mine been Dios psilaa me ne lo xtol ne; per na rgobey naa nonguielraaw cso naa diidz lo to, ib gandzede to grë zha ne rtsidil mine rliladz ne. (Dios bneedz diidz gocndion new, ne nac ne zha ne brieë lo dol bziaab ne xnëz me.) ⁴Sac gon, blalaa zha ne rquiaalo rliladz Dios, ngueets zhliaan laa zho bzëëb lad to i. Miech yozha, niapse lo dol no zho, rnee zho zac gun ne ncuaane guiaabtaa guic ne, sac nquialadz Dios ne; ib rliladz zho Jesús, Men ro, Men nroob ne rnabey ne. Padzeelale goquiet, ne grëse miech ne sca nac, lëëque lo xtol zho nitlo zho.

⁵Gołsoladz ganle zha bzhaac grë zha ne gocntseeb lo Dios padzeela. Niicle ne nanle tow, per laaw gzet naa lo to nu, zeena csoladz tow.

Zeene psilaa Dios grëse menladz ne lo guielnë ne noded zho Egipt ga, zha ne brieëquia ib bnëd niunbey me, ib gondzed me zho, bnitlo me zho. ⁶Scaque grë anjl ne biche lo me, psaan zho dziin ne pso me zho; bdziguiend me zho, laa me nsioogyu zho tib lo guielcowdoo, ga quiadoo zho haxta gdzin dze ne laa me gun guielwxtis.

⁷Rsoladz to ganle zha goc guiedz Sodom, guiedz Gomorr, ni grëraa guiedz las ne bre gax ga. Grë miech ne bio grë guiedz co, laa zho güeynal mine nacdraa guieltsieel, tel chotaa pquiangob zho, bionie zho haxta grë mrazh; grëse zho, lo gui ga bnitlo zho. Ga rlu ganle, grëse zha ne csaand xquiełntseeb, no tib lo gui dox ne gdziñd dze guiuu, ni ga nitlo zho.

⁸Ni zha ne gon blanso lo to i, scadaa run zho; sac tel zha, niapse guielyozh zienal zho, laa zho nosanbeed xcuerp zho, ib rond zho mine rnee zha ne rnabey, haxta rdzibdee zho grë men non ne no gbaa. ⁹Per ni anjl Miguel, anjl rnabey ne bdilnie mendox zeene güeyla me xcuerp Moisés, ib beend me ndziibdee

me mendox; lëë gdib rëb me: “¡Dios nac meñ ne gunquizh luu mine run luu i!” ¹⁰Laa grë zha qui, haxta grë ncuaañe run Dios, ncuaañe ni rioguicd zho zha nac, laa zho rdzibdeew; masaque mban zho zigne mban grë ma, laa zho run ncuaañe rdeedtaa guxt xcuerp zho; lëëque zha nonitlo zho ga.

¹¹¡Probsaxe zho! Sac gon, nëz ne zey Caín ga zienal zho. Lo guielblë dimi, laa zho brieë xnëz Dios zigne brieë Balam; ni zigne gut Coré zeene gocntseeb me lo Moisés, scaque nitlo zho.

¹²Zeene rиаad zho lo guielwagw ne run to, loxaque rzhidznie zho, loxaque runnguzee zho, rzob zho rlozhd gowcho zho, zieniedraa guic zho dien choraa no gow; ni lalnu guielto guieñd lo zho.

Nëzrii nëzrec quianzë zho, masaque nac zho zig nac xcow ne ziaadnied nisguie, loxaque nëzrii nëzrec rienie mew; zig nac tib yag bgool ne guieñd nex lo, leñ dze ne no yquia nex low. Laa zho bnitlole ga, masaque nac zho zig tib yag bidz ne bliaadzle dib lo; sac tel yag bidza, gdzindraa dze ne yguiaw.

¹³Zigne nëzrii nëzrec rchoon nisdoo grë mtsiin beed ne ndziib low, scadaa nëzrii nëzrec nolu grë ncuaañe mbeeguieñto ne quiyun zho. Laa zho ziele nëz lo guielcowdoo ne rieguial zho, zaatne gdzindraa dze gree zho; zig tib mel gbaa ne bnitnëzle, laa ma nonziaabse lo guielcow.

¹⁴Lëële zha qui ga bzeet Enoc (meñ ne brieequia lo dii ne rac xoop xtií Adán), zeene psiaab Dios guic me, rëb me: “Golwi ganle laa Dios ziaad, pe zhidaa grë anjñ ne ziaadnie me, ¹⁵ziaadgun me guielwxtis. Grëse miech ntseeb, laa me gunquizh zho grëtaa dol ne been zho, grëtaa diidz dox ne brieë ro zho bneenë zho me.” ¹⁶Ni nligaa sca nac grë zha qui, ib nod ncuaañe tso zho conform, tibaque wlisqui no zho; laa zho zienal grëtaa guielyozh, ncuaañe racladztaa xcuerp zho. Rto zho guieldzin, rlozhd dieen pa rac zho, rio zho pe diidz wen ne rnee zho lo miech, loxaque ne dien zha yquidie zho miech, gun zho mine racladz zho.

Laa naa rso diidz lo to

¹⁷Sangué to bets, bzian, golsoladz mine bnee grë zha ne pxeel Jesús bnee Xtiidz me, zeene biadseed zho to; ¹⁸led znu rnee zho: “Zeene zhile gdziñ dze ne laa guidzliu rii nitlo, zrieequia grë miech ntseeb ne gzhidznie zhiwseed Jesús, laa zho gban zigne nactaa grë zhgab yozh ne guiab guic zho.” ¹⁹Ni nligaa ran to niina ganle sca quiyaca, lëë grë zha co i squi nogodil grë zha ne no xnëz Jesús. Nacnied zho Espíritu Sant, gane niapse grë ncuaañe dol ne racladz xcuerp zho, min co run zho.

²⁰Bets, bzian, golguien sca tibaque dziits golso lo Xtiidz Dios mine rliladz to. Golzodiidznie Dios, zigne csiaab Espíritu Sant zdoo to. ²¹Sozite to lo Dios, golguien ganle zha rleynietaa me to; golquiambëz dzian ne gal dze ne ygaa ne guielmban ne gdzind dze lozh, mine ndionpaa ne gneedz Jesús meñ ne rnabey ne, porne rquia zdoo me ne.

²²Teñ cho zha ne racchop guic lo Xtiidz Dios, golnee lo zho biire sodziits zho stib. ²³Zha ne bii no lo dol, golnee lo zho guien zho csaan zhow; golcuae zho

lo gui ne noxtseeb zho yгаа zho га; scagaa grëraa miech, golquia zdoo zho, per ib cxende to lo zho. Ni lalnu gdziguiende to grë dol ne run zho, golsaca zig rzac to tib ncuaane rbixnë zdoo to ran to.

²⁴⁻²⁵ Tibaque Dios no, me psilaa ne lo dol, ni megaa csilaa grëraa miech. Men nroob nac me, ni zrieelo gacnieñ me to guiabde to lадznia dol stib; zeena ine mbe to, ine rley to laa me gdzinnie to zaatne nac lo guieindzondoo ne no me.

Niina ne laa ne rdziuunbeyle Jesús, zrieelo dzioolnie ne me, mese nac men nroob, men ndzon, men ne rap guieinabey. Tibaque nac me, niicle mazd glow, niicle niinaw, ni gdziñd dze ne gdzëë me. *Judas*